


www.BibleForChildren.org




Paidāish 6



Yih us kī zindagī kā bayān hai.
Nūh rāstbāz thā. Us zamāne
ke logoñ meñ sirf wuhī
bequsūr thā. Wuh Allāh ke
sāth sāth chaltā thā. Jahān bhī
Allāh dekhtā duniyā kharāb thī,


kyonki tamām jāndāroñ

ne zamīn
par apnī rawish ko
bigār diyā thā.




Tab Allāh ne Nūh se kahā, "Maiñ ne tamām
jāndāroñ ko ḵhatm karne kā faislā kiyā hai,
kyoñki un ke sabab se pūrī duniyā
zulm-o-tashaddud se bhar gaī hai.


Chunāñche maiñ un ko zamīn
samet tabāh kar dūngā."



"Ab apne lie saro kī lakaṛī kī kashtī banā le.
Us meñ kamre hoñ aur use andar aur
bāhar tārkol lagā."




Us kī lambāī 450 fuṭ,
chaurāī 75 fuṭ aur
ūñchāī 45 fuṭ ho.



"Jo bhī ƙhurāk darkār hai
use apne aur un ke lie
jamā karke kashtī meñ
mahfūz kar lenā."




Har qism ke jānwar kā ek nar aur ek mādā bhī apne sāth kashtī meñ le jānā tāki wuh tere sāth jīte bacheñ.




Har qism ke pāk jānwaroṅ meṅ se sāt
sāt nar-o-mādā ke joṛe jabki
nāpāk jānwaroṅ meṅ se
nar-o-mādā kā sirf ek ek joṛā
sāth le jānā.






Tūfānī sailāb se
bachne ke lie Nūh apne
beṭoñ, apnī bīwī aur bahuoñ
ke sāth kashtī meñ sawār huā.





Yih sab kuchh us waqt huā jab
Nūh 600 sāl kā thā. Dūsre mahīne
ke 17weñ din zamīn kī gahrāiyōñ meñ
se tamām chashme phūṭ nikle aur āsmān
par pānī ke darīche khul gae.





Chālīs din aur chālīs rāt tak mūslādhār
bārish hotī rahī.




Pānī zor pakar kar bahut barh
gayā, aur kashtī us par tairne lagī.




Āḡhirkār pānī itnā zyādā ho gayā ki tamām ūñche pahār
bhī us meñ chhup gae. Zamīn par har jāndār maḡhlūq
halāk huī.



Lekin Allāh ko Nūh aur tamām jānwar
yād rahe jo kashtī meñ the. Us ne hawā
chalā dī jis se pānī kam hone lagā.





Chālīs din ke bād Nūh ne kashtī kī khiṛkī khol kar ek kawwā chhoṛ diyā, aur wuh uṛ kar chalā gayā. Lekin jab tak zamīn par pānī thā wuh ātā jātā rahā. Phir Nūh ne ek kabūtar chhoṛ diyā tāki patā chale ki zamīn pānī se nikal āī hai yā nahīn.



Dūsre mahīne ke 27weñ din zamīn bilkul ḡhushk ho
gaī. Phir Allāh ne Nūh se kahā, “Apnī bīwī,
beṭoñ aur bahuoñ ke sāth
kashtī se nikal ā.”



Us waqt Nūh ne Rab ke lie qurbāngāh banāī. Us ne tamām phirne aur uṛne wāle pāk jānwaroñ meñ se kuchh chun kar unheñ zabah kiyā aur qurbāngāh par pūrī tarah jalā diyā.



Is abadī ahd kā
nishān jo main
tumhāre aur tamām
jāndāron ke sāth qāym
kar rahā hūn yih hai ki
main apnī kamān bādalon
meñ rakhtā hūn. Wuh mere

duniyā ke sāth ahd kā
nishān hogā.




Jab kabhī mere
kahne par āsmān
par bādāl chhā
jāeñge aur
qaus-e-quzah un meñ
se nazar āegī to main yih
ahd yād karūnga jo tumhāre


aur tamām jāndāron
ke sāth kiyā gayā hai.
Ab kabhī bhī aisā
sailāb nahīn āegā jo
tamām zindagī ko
halāk kar de.



Phir Allāh ne Nūh aur
us ke beṭoñ ko barkat de kar kahā,
“Phalo-phūlo aur tādād meñ
barḥte jāo. Duniyā tum se bhar jāe
zamīn par phirne aur reñgne
wāle jānwar, parinde aur
machhliyāñ sab tum
se ḍareñge.”



“Nūh ke jo beṭe us ke
sāth kashtī se nikle Sim, Hām aur
Yāfat the. Hām Kanān kā bāp thā.
Duniyā-bhar ke tamām log in
tīnoñ kī aulād haiñ.”



Kyōnki Allāh ne duniyā se itnī muhabbat rakhī ki us ne apne iklaute Farzand ko baḡhsh diyā, tāki jo bhī us par īmān lāe halāk na ho balki abadī zindagī pāe.



Romiyon 3:23 sab ne gunāh kiyā, sab Allāh ke us jalāl se mahrūm haiñ jis kā wuh taqāzā kartā hai,

Romiyon 6:23 Kyoñki gunāh kā ajr maut hai jabki Allāh hamāre Ḳhudāwand Masīh Īsā ke wasīle se hameñ abadī zindagī kī muft nemat atā kartā hai.

Ibrāniyon 9:27 Ek bār marnā aur Allāh kī adālat meñ hāzir honā har insān ke lie muqarrar hai.

Ifisiyon 2:8,9 Kyoñki yih us kā fazl hī hai ki āp ko īmān lāne par najāt milī hai. Yih āp kī taraf se nahīñ hai balki Allāh kī baḳhshish hai. Aur yih najāt hameñ apne kisī kām ke natīje meñ nahīñ milī, is lie koī apne āp par faḳhr nahīñ kar saktā.



Romiyon 10:9,10 Yānī yih ki agar tū apne muñh se iqrār kare ki Īsā Ḳhudāwand hai aur dil se īmān lāe ki Allāh ne use murdon meñ se zindā kar diyā to tujhe najāt milegī.

Kyonki jab ham dil se īmān lāte haiñ to Allāh hameñ rāstbāz qarār detā hai, aur jab ham apne muñh se iqrār karte haiñ to hameñ najāt miltī hai.

Yūhannā 3:16,17 Kyonki Allāh ne duniyā se itnī muhabbat rakhī ki us ne apne iklaute Farzand ko baḳhsh diyā, tāki jo bhī us par īmān lāe halāk na ho balki abadī zindagī pāe. Kyonki Allāh ne apne Farzand ko is lie duniyā meñ nahīñ bhejā ki wuh duniyā ko mujrim ṭhahrāe balki is lie ki wuh use najāt de.



1 Yūhannā 5:11-13 Aur gawāhī yih hai, Allāh ne hameñ abadī zindagī atā kī hai, aur yih zindagī us ke Farzand meñ hai. Jis ke pās Farzand hai us ke pās zindagī hai, aur jis ke pās Allāh kā Farzand nahīñ hai us ke pās zindagī bhī nahīñ hai. Maiñ āp ko jo Allāh ke Farzand ke nām par īmān rakhte haiñ is lie likh rahā hūñ ki āp jān leñ ki āp ko abadī zindagī hāsil hai.



Paidāish 6 – 10

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Urdu Geo Roman Bible (urd) © 2019 Urdu Geo Version.
CC-BY-NC-ND

<https://www.bible.com/bible/1887/GEN.1.GVR>

©2026 Bible for Children, Inc.

www.M1914.org

www.bibleforchildren.org

